



SAKSPAPIR

Saksnr	Utval	Type	Dato
69/2021	Formannskap/plan- og økonomiutvalet	PS	31.08.2021

Sakshandsamar	Arkiv	ArkivsakID
Tore Henrik Øye	FA-K40, TI-&13	21/752

UTTALE TIL HØYRING PÅ FORSKRIFT OM JAKT- OG FANGSTTIDER 2022-2028 FRAMLEGG TIL UTVIDA JAKTTID PÅ HJORT

Vedlegg:

Uttale til høyring om jakttider 2022-2028

Informasjon om innspel frå kommunane i Vestland ved høyring av forskrift om jakt- og fangsttider 2022–2028

Høyring på forskrift om jakt- og fangsttider 2022-2028

Kommunedirektøren sitt framlegg til vedtak:

Vaksdal kommune, ved formannskapet, sender uttale til høyring om ny jakttidsforskrift for perioden 2022-2028, med framlegg til følgjande endring:

- Endring av jakttid på hjort, med jakttidsramme frå og med 20 august til og med 23. desember, og frå og med 1. januar til og med 31. januar.

Uttalen skal sendast til Vestland fylkeskommune innan 10. september, slik den ligg føre, jamfør vedlegg.

Formannskap/plan- og økonomiutvalet - Sak 69/2021

FPØ - Behandling:

Samrøystes vedteke.

FPØ - Tilråding/Vedtak:

Vaksdal kommune, ved formannskapet, sender uttale til høyring om ny jakttidsforskrift for perioden 2022-2028, med framlegg til følgjande endring:

- Endring av jakttid på hjort, med jakttidsramme frå og med 20 august til og med 23. desember, og frå og med 1. januar til og med 31. januar.

Uttalen skal sendast til Vestland fylkeskommune innan 10. september, slik den ligg føre, jamfør vedlegg.

Saksopplysningar:

Samandrag/konklusjon (kort om saka)

Miljødirektoratet har sendt framlegg til nye jakttider for perioden 2022-2028 på offentlig høyring. Vaksdal kommune skal sende sin uttale til Vestland fylkeskommune innan 10. september 2021.

Dagens jakttid på hjort varer frå og med 1. september til og med 23. desember. Kommunedirektøren går inn for endring av jakttida i den nye forskrifta, med jaktidsramme frå og med 20. august til og med 23. desember, og frå og med 1. januar til og med 31. januar. Det skal berre vere lov til å jakte på innmark i august månad. Grunngevinga for framlegget til endra jakttid, er bestandsstorleiken og skadesituasjonen i jordbruket (beiteskadar på engareal).

Kommunedirektøren har utarbeidd framlegg til uttale med argumentasjon, som grunnlag for handsaming i formannskapet og innsending til fylkeskommunen.

Bakgrunn for saka

Miljødirektoratet har sendt framlegg til forskrift om jakt- og fangsttider 2022-2028 på høyring, mellom anna med kommunane som høyringspart. Uttalar frå kommunane skal sendast til Vestland fylkeskommune innan 10. september, for samanstilling og vidaresending til Miljødirektoratet.

Den nye forskrifta skal erstatte dagens forskrift, som gjeld fram til 1. april i 2022.

Miljødirektoratet har ikke gjort framlegg om å endre jakttida på hjort i den nye forskrifta. Dagens jakttid går frå og med 1. september til og med 23. desember.

Jaktidsramma for hjort inngår i utgangspunktet ikkje i høyringa, men det er likevel opna for å kome med innspel til heile forskrifta, inkludert jakttid på hjort, jf. brev frå Vestland fylkeskommune av 18.06.21.

Formelt grunnlag

- Lov om viltet (viltlova).
- Forskrift om jakt- og fangsttider.

Vurdering og konsekvensar

Hjortestamma i Vaksdal kommune har vore i vekst over fleire år, med aukande skadepress på innmark som ei av følgjene, spesielt i dei største jordbruksområda. Dette går ut over grasavlingane og driftsøkonomien til gardbrukarane.

Vaksdal kommune har gjennom sin temaplan for hjorteforvaltning 2019-2023, mål om å stoppe bestandsveksten og redusere bestandane, med mindre skadepress på innmark som resultat. Den

utøvande bestandsforvaltninga byggjer i hovudsak på bestandsplanar i regi av jaktrettshavarane, med utgangspunkt i kommunen sine overordna mål. Tildeling av løyve - og uttaket av felte dyr - har auka jamt med åra, med høg, årleg fellingsprosent.

Grunna høgt skadepress på graseng, vert det søkt om - og tildelt - «skadeløyve» - nærast kvart år, spesielt i Eksingedalen. Målet framover, er å føre ei forvaltning og avskyting som gjer at behovet for uttak av «skadedyr» vert redusert, først og fremst gjennom bestandsregulerande tiltak. Dette må sjølv sagt sikrast gjennom ei aktiv og godt organisert jaktutøving. Men når det gjeld skadepresset på innmark - og uttaket av «skadedyr» - kan lengda på den ordinære jakttida også ha ei tyding.

Jakttida på hjort er i dag relativt lang, og den vart utvida og framskunda for ein del års sidan, mellom anna for å leggje til rette for eit større uttak, spesielt i «høgareliggjande» strøk, der dyra trekk tidlegare vekk enn i andre område. Likevel kan ei ytterlegare framskunding av jakttida, til dømes med jaktstart 20. august, føre til større sjanse for å ta ut dyr, spesielt skadegjererar på engareal, både i høgareliggjande strøk og elles. Eit målretta uttak, avgrensa til innmarksareal, vil i dette høvet, vonleg vere med å redusere skadepresset på innmark over tid, og føre til færre søknadar om uttak av «skadedyr». Kommunedirektøren gjer difor framlegg om å framskunde jakta, med jaktstart frå og med 20. august, berre med innmarksjakt fram til 1. september. I tillegg vert det gjort framlegg om å opne for jakt ut januar månad på alt areal, for å leggje til rette for maksimalt uttak i høve til tildelt kvote og bestandssituasjonen lokalt.

I samband med utbrot av skrantesjuke (CWD) på reinsdyr i Storfjella, utvida Miljødirektoratet jakttida på hjort i randkommunane til villreinområdet, med jaktstart 20. august. Styremaktene kom i dette høve fram til at endringa er forsvarleg, biologisk og etisk. Ei framskunding av ordinær jakttid, som Kommunedirektøren føreslår, vil samsvare med praksisen det er opna for kring Storfjella, og soleis vere å tilrå som tidspunkt for jaktstart.

Ved vurdering av jakttider på hjort og andre artar, er det fleire forhold som må vurderast, mellom anna omsynet til friluftsinnteressene. I dette høvet er vurderinga at framlegget om å framskunde jaktstarten på hjort til 20. august, avgrensa til jakt på innmark etter friluftslova sin definisjon, ikkje vil gå ut over anna friluftsliv.

Kommunedirektøren har ikkje merknadar til forskrifta sine jakttider på andre artar.

Kommunedirektøren gjer framlegg om å sende uttalen til ny forskrift om jakt- og fangsttider 2022-2028, som den ligg føre, jf. vedlegg.